

Dictado 2014 : Reglanan basico (2)

PLURAL

Plural ta expresa un cantidad di mas cu un (1). Un sustantivo of un adhetivo ta haya e forma plural "nan", ora cu e sustantivo ta representa un cantidad di mas cu un y si e sustantivo ta specifica.

Specificacion di sustantivo

Un sustantivo ta specifica ora cu tin "e" (articulo defini) of "mi, bo, su, nos, boso, nan" (pronombre posesivo) su dilanti.

Ehempel: Ana a compra **e awacatinan**.
Buchi a verf **mi bentananan**.

Tambe e sustantivo ta haya e forma "nan" ora cu tin un pronombre demostrativo: "e... aki - e... ey - e... aya".

Ehempel: **E blasnan aki** ta kibra.
E copinan ey ta bon.
E matanan aya ta bunita.

Ora cu un sustantivo no ta specifica, e no ta haya e forma plural "nan".

Ehempel: Amanta ta bende **pastechi**.
Carchi ta obtenibel na Cas di Cultura.

Na momento cu un sustantivo tin un palabra cu ta indica un numeral indefini su dilanti, e no ta haya e forma plural "nan".

Ehempel: **Hopi estudiante** a bai Hulanda.
E cuashi a perde **algun cabey**.
E saco ta **yen di kiniki**.

Sustantivo cu ta indica nocion di plural

Ora tin un sustantivo cu ta indica nocion di plural sigui pa preposicion "di", e otro sustantivo no ta haya forma plural "nan".

Ehempel:	<i>coleccion di stampia</i>	<i>mescla di cancion</i>
	<i>batayon di abogado</i>	<i>monton di sushi</i>
	<i>boletin di noticia</i>	<i>paki di sigaria</i>
	<i>bonder di paña</i>	<i>par di sapato</i>
	<i>bulto di paña</i>	<i>programa di actividad</i>
	<i>caha di suafel</i>	<i>registro di negoshi</i>
	<i>cantidad di hende</i>	<i>nij di hende</i>
	<i>carga di CD</i>	<i>seleccion di CD</i>
	<i>carton di sigaria</i>	<i>serie di pregunta</i>
	<i>centro di ciego</i>	<i>set di stul</i>
	<i>coalicion di partido</i>	<i>ciclo di charla</i>
	<i>cuerpo di polis</i>	<i>sociedad di ingeniero</i>
	<i>conseho di ministro</i>	<i>stapel di buki</i>
	<i>dozijn di webo</i>	

Plural y sustantivo generico

Ora tin un sustantivo y kier generalisa esaki, no ta uza forma plural "nan".

Ehempel: **Cascabel** ta **bestia peligroso**.

Den e ehempel aki cascabel ta conta pa tur cascabel, kemen cu tur cascabel ta bestia peligroso.

Plural y grupo specifico

Ta uza forma plural ora ta trata di un grupo specifico.

Ehempel: **Dama y cabayeronan**, **mi** kier a yama boso tur bonbini.
"Muchanan, boso pasa akibanda."

Plural y pronombre interrogativo "cua"

Ora cu ta trata di sustantivo na plural y cu tin e pronombre interrogativo "cua" su dilanti, ta uza e forma plural "nan".

Ehempel: **Cua mesanan?** Esakinan.

Palabra cu ta reemplasa sustantivo

Palabra cu ta reemplasa sustantivo na plural, ta haya e forma plural "nan": esunnan, esakinan, eseynan, esayanan, kennan, kendenan, cuanan, cualnan.

Ehempel: **E hungadonan**, **kennan** a bai Merca, **ta bolbe mañan**.
E mesanan di mi. **E di minan**.

Number y fam na plural

Number y fam por haya e forma plural "nan" su tras. Ora e forma plural "nan" ta para tras di un number of fam, por interpreta e plural na dos manera.

Ehempel: **Claudianan** - **"tur hende cu yama Claudia**
- **"Claudia y su grupo of team of su amigo, su ruman, etc.**

Plural y numeral

Entre articulo defini, pronombre posesivo y e "e" di pronombre demostrativo y sustantivo por aparece entre otro: numeral defini, numeral defini + mid, numeral indefini, numeral indefini + mid, numeral colectivo, numeral +adhetivo.

Ehempel: **E tres siboyonan** aki ta grandi.
El a compra mi tres liber di tomatinan.
Di e poco stulnan cu mi tin, **dos so ta hente**.
El a compra e poco liber di tomatinan cu a resta.
Su dos par di sapatonan mester un polshi.
Su tres bunita autonan ta bendi caba.

Plural y adhetivo

Ora un adhetivo ta patras di un sustantivo e por haya e forma plural "nan" na luga di e sustantivo. Ehempel: **E flor bunitanan**.

Plural y genero

Ta uza plural "nan" tras di un sustantivo cu ta denota sexo.

Ehempel: **E yiu hombernan**.
E ruman muhenan.
E pushi machonan.
E pushi embranan.

Plural y composicion

Composicion ta un combinacion di dos of mas palabra cu hunto ta forma un palabra nobo. Ta pone plural "nan" tras di e prome sustantivo of tras di e ultimo sustantivo di e composicion.

Ehempel: **E mashinnan di feita** ta bendi caba.
Pone e mesa di palonan un banda.
Ban corta e mat'i hubadanan.

PREPOSICION

Preposicion ta palabra manera: cu, den, di, riba, pa, banda di, tras di, rond di, transcurs di, di, parti di, etc.

Tin tres diferente sorto di preposicion:

- Preposicion simpel
- Preposicion componi
- Expresion preposicional

Preposicion simpel

Preposicion simpel ta consisti di un solo palabra. Por ehempel: cerca, contra, cu, den, di, entre, na, pa, riba y te.

Preposicion componi

Preposicion componi ta consisti di dos of mas palabra. Por ehempel: banda di, bou di, cerca di, dilanti di, dor di, for di den, meimei di, pabou di, pafo di, panort di, pariba di, pasuit di, patras di, rond di y tras di.

Uzo di preposicion "contra"

E preposicion "contra" ta denota a) un relacion di espacio of b) un relacion di oposicion

- Relacion di espacio

Den e relacion aki e preposicion "contra" ta indica contacto entre dos entidad di e relacion preposicional.

Ehempel: **Buchi a dal su pia contra e piedra**.

- Relacion di oposicion

Ehempel: **Tin hende ta contra cierto reglanan nobo**.

Den e relacion aki "contra" por tin uzo figurativo.

Ehempel: **Mi a laga mi yiu sali contra mi boluntad**.

NUMERAL

Un numeral ta un palabra cu ta indica un cantidad exacto of no exacto.

Ehempel: **E tin tres mata** di mango.
Tin algun mucha bou pa'i kwihi.
El a compra un dozijn di webo.
E lo ta e ultimo biaha cu lo mi haci pa Africa.
Esaki ta e di cuatro biaha pa Argentina.

Ta parti numeral den:

- numeral cardinal
- numeral ordinal
- fraccion
- multipel
- sustantivo colectivo

Ta clasifica numeral den dos subcategoria:

- defini
- indefini

Ehempel:

Numeral	defini	Indefini
Cardinal	Dos, cinco, ocho, trinticuatro, nueve mil	Diferente, hopi, tur, varios
Ordinal	di tres, di shete, di nuebe	multipel, di tanto, tantisimo
Fraccion	2/5 dos di cinco parti 2 2/3 dos y dos di tres parti	
Multipel	enkel, dobel, tripel	Multipel
Sustantivo colectivo	dozijn, lustro, par, decada	

Numeral cardinal

Numeral cardinal cu ta defini ta cuminsa di cifra un (1) te infinito.

Ehempel: **Tin cuatro kiniki den e saco**.

Atencion:

Ta uza cifra Romano pa indica number di capitulo, papa, rey, etc.

Ehempel: **Papa Benedicto XVI** (diesseis)

Numeral cardinal cu ta indefini ta indica e cantidad, manera: varios, tiki, tur, etc.

Ehempel: **Algun** di nan ta traha diadomingo.

Numeral ordinal

Numeral ordinal ta indica orden di grado y secuencia defini, manera: prome, di dos, di tres, etc.

Ehempel: **Awo ta di dos biaha** cu e ta keda sinta.

Numeral ordinal indefini ta un numeral cu ta indica orden di grado y secuencia cu no ta defini, manera: memey, ultimo, di tanto, etc.

Ehempel: **Pa di tanto biaha** mi ta bisa bo cu mi no ta bay.

Fraccion

Fraccion ta un numeral cu ta indica parti di un totalidad.

Ehempel: $\frac{1}{2}$ **mita**, **mei**.
Mita dia so e ta traha.

Mas ehempel: $\frac{1}{3}$ **un di tres parti**

un tercera parti

$\frac{1}{4}$ **un cuart**

un cuarto

$\frac{2}{5}$ **dos di cinco parti**

dos cinco parti (den caso di mid)

$\frac{0,6}{1}$ **cero punto seis**

Numeral multipel

Numeral multipel ta expresa cuanto biaha tin multiplicacion, manera: duplo, tripel, etc.

Ehempel: **E ruta aki ta dobel largo compara cu esun otro**.

Numeral sustantivo colectivo

Numeral colectivo ta indica un cantidad exacto den palabra, manera: gros, decada, centenares, decenas, par, lustro, dozijn, kinsena.

Ehempel: **Tur kinsena** e ta cobra. (cada dos siman)



Registra na: fundacion.lanta.papiamento@gmail.com

Gran dictado di Papiamento tin atencion di nos lectornan

ORANJESTAD- Cu gran satisfaccion y alegria nos a tuma nota di e reaccionnan cu nos a ricibi pa medio di nos e-mail adres.

Nos ta masha orguyoso di ciudadanonan cu no ta papia so pero realmente ta demostra nan preocupacion, nan amor y nan inkietud pa nos dushi Papiamento. Manera Bon Dia Aruba a trece dilanti den publicacion anterior, nos ta duna tur sosten na e grupo di trabou y nos sosten pa promove idioma di nos pais.

Bon Dia Aruba ta haci uzo di e experticio di e profesionalnan den e materia y como tal nos ta manda tur pregunta cu nos ricibi pa e expertonan pa nan duna nan contesta profesional riba e preguntanan cu nos a ricibi.

Nos ta pidi nos lectornan un poco pasenshi si acaso e contestacion no drehta mes un momento cu e pregunta a wordo lansa. Nos ta spera cu nos por entama un intercambio di informacion, discusion sano cu ta contribui na nos formacion intelectual, social y cultural.

Nos ta aprecia tur clase di sugerencia cu por yuda nos pa realisa nos meta proponi. Desde inicio nos ta pone bon cla cu nos lo no publica ningun reaccion cu ta purba ofende of pone un otro persona pa su opinion contra muraya den nos edicion special di Gran dictado di Papiamento.

Pa opinion nos seccion di Opinion ta habri pa tur lector of organisacion cu ta desea di haci uzo di esey.

Nos ta pidi nos lectornan pa di nan forma yuda nos den nos afan pa promove nos Papiamento dignamente. □